



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Reziaun Espesiál Oecusse-Ambeno (RAEOA)
24 Novembru 2017

Estrutura Suku no membru comunidade Suku Abani, Suniufe no Bobometo
Reziaun Espesiál Oe-Cusse-Ambeno (RAEOA) preokupa no sei iha konfuzsaun ho
situasaun polítika atuál

Ekipa *Judicial System Monitoring Programme (JSMP)* habelar informasaun ba comunidade liuhosi treinamentu ba iha xefe suku no estrutura Konsellu Suku, inklui membru comunidade balun iha àrea remota sira iha Rejiaun Autónoma Espesiál Oecusse-Ambeno (RAEOA).

Iha 16 Novembru 2017, JSMP hala'o treinamentu iha Suku Abani, Postu Administrativu Passabe. Partisipante hamutuk ema nain 30 ne'ebé kompostu hosi fetu 15 no mane 15.

Tuir-mai, iha 20 Novembru 2017, JSMP hala'o treinamentu iha Suku Suniufe, Postu Administrativu Nitibe. Partisipante hamutuk ema nain 30 ne'ebé kompostu hosi fetu nain 19 no mane 11.

Iha 21 Novembru 2017, JSMP hala'o treinamentu iha Suku Bobometo, Postu Administrativu Oesilu. Partisipante hamutuk ema nain 30 ne'ebé kompostu hosi fetu nain 15 no mane nain 15. Totál partisipante hosi treinamentu 3 ne'e ema nain 90 ne'ebé kompostu hosi fetu nain 49 no mane nain 41.

Objetivu hosi treinamentu ne'e maka atu habelar informasaun no hasa'e koñesimentu partisipante sira-nian kona-ba demokrásia, knaar órgaun soberanu sira-nian, partisipasaun públiku iha proseu halo lei no mós asesu ba justisa formál.

"Treinamentu ne'e, aleinde hasae partisipantes sira-nia koñesimentu, iha tempu hanesan promove diskusaun no mós oportunidade ba sira hodi hato'o sira-nia hanoin, dúvida no komentáriu ba asuntu relavante sira iha jerál no partikularmente iha sira-nia comunidade," dehan Diretór Ezekutivu JSMP, Luis de Oliveria Sampaio.

Materia sira ne'ebé apresenta iha trenamentu ne'e fahe ba iha sesaun rua. Sesaun dahuluk ko'alia kona-ba demokrásia, knaar órgaun soberania sira-nian no partisipasaun públiku iha prosesu halo lei no sesaun daruak kona-ba asesu ba justisa formál.

Partisipante sira antusiasmu ho materia sira ne'ebé JSMP fornese tanba konsidera importante no relevante tebes ho sira-nia knaar no mós situasaun real iha comunidade laran. Kestaun no preokupasaun partisipante sira foti iha treinamentu 3 ne'e, partikularmente sasaun kona-ba demokrásia nian mak kona-ba situasaun polítika atuál iha rai-laran. Preukupasaun sira ne'e liu-liu diskute orientadu kona-ba formasaun kestaun konstitusionaliade hosi Governu VII. Sei Parlamentu Nasionál la aprova

programa governu, oinsá nia konsekuénsia? Oinsá kona-ba kestaun eleisaun antesipada?. Ho pergunta sira ne'e hotu, partisipante sira konklui katak demokrásia ne'e di'ak, maibé dalaruma mós halo sira konfuzaun, liu-liu situasaun polítika ida agora nian.

Hatan ba kestaun sira ne'e, JSMP dehan katak atu hatene kona-ba formasaun governu, presiza hatene prosesu polítika hahú kedas hosi kampaña eleisaun parlamentár nian no depoisde eleisaun. Iha eleisaun, CNRT kompromete ba nia eleitoradu sira katak CNRT sei la ba ukun bainhira nia la manan ho maiória absoluta hodi ba ukun mesak.

Depoisde eleisaun, CNRT nafatin halo deklarasaun polítika katak mantein sira-nia desizaun no hakarak sai opozisaun bainhira Prezidente Repúblika bolu partidu polítiku sira ne'ebé iha asentú parlamentár hodi rona sira-nia hanoin nomós bainhira partidu Fretilin ne'ebé hetan votu barak liu haruka karta konvite ba sira hodi halo koligasaun.

Liuhosi prosesu negosiasaun ne'ebé naruk no han tempu, Fretilin konsege halo koligasaun ho PD no KHUNTO hodi hetan maiória parlamentár iha termu foti desizaun atu forma governu. Tanba antes atu forma governu, tenke harii uluk Parlamentu Nasionál.

Parlamentu Nasionál harii ho partisipasaun KHUNTO no PD maibé depois KHUNTO dada-an sai depoisde Parlamentu harii tiha no prosesu formasaun governu hahú. Mesmu nune'e, formasaun governu tenke kontinua no governu foun mós la'o ba oin, tanba nia la'o tuir Konstituisaun.

Bainhira governu nia programa la liu dalarua tutuir malu iha Parlamentu Nasionál, mak tuir Konstituisaun Prezidente Repúblika bele hatun tiha governu no hasai tiha Primeiru Ministru no bolu fali partidu ne'ebé manan ho segundu maiória atu forma governu.

Maibé bainhira Fretilin ho PD la simu no dada-an sai hosi Parlamentu, mak Parlamentu sei la funsiona, tanba tuir Konstituisaun kompozisaun Parlamentu Nasionál mínimu deputadu 52 no opozisaun iha de'it deputadu 35. Wainhira kompozisaun ne'e la hetan tama ona krize institusionál grave, Prezidente Repúblika tuir Konstituisaun bele sobu ona Parlamentu no deklara eleisaun antesipada.

Iha parte seluk, Xefe Suku Suniufe husu kontribuisaun sosiédade sivil nian, partikularmente JSMP atu bele hadi'a situasaun ne'e, liu-liu bele hetan solusaun polítika ida ne'ebé ba parte hotu no bele evita krize. JSMP hatan ba kestaun ne'e katak JSMP hato'o ona nia paraser ka hanoin ba Parlamentu Nasionál no órgaun sira seluk kona-ba formasaun governu ne'e no JSMP sei nafatin kontinua fó nia hanoin hodi bele solusaun ida ne'ebé di'ak ba ema hotu.

Iha parte asesu ba justisa nian, partisipantes sira husi Suku tolu ne'e husu ba JSMP atu kontinua ho formasaun ne'e iha futuru to'o iha nivél aldeia. Partisipantes sira konsidera informasaun kona-ba asesu ba justisa formal ne'e importante tebes no kazu barak mak mai ho karakter lahanesan.

Lia nain husi Suku Bobomento husu ba JSMP atu nafatin fahe informasaun kona-ba asesu ba justisa formal liu-liu kona-ba krime sira tanba durante ne'e kazu balun mak sira falla atu halo mediasaun iha suku no lakonsege hetan desizaun.

Hatan ba preokupasaun ne'e, JSMP rekomenda katak Xefe Suku ho membru konsellu sira tenke hatene halo diferensia kona-ba krime públiku no krime semi públiku. Kuandu kazu ne'e kategoria ba krime públiku hanesan violénsia doméstika, oho ema, abuzu seksuál ba ménor no violasaun seksuál, lideransa komunitáriu sira labele rezolve de'it tuir mekanismu tradisionál maibé tenke halo prosesu formal to'o iha tribunál mesmu parte sira hakarak atu dame malu de'it iha nivél suku. Xefe suku no membru Konsellu Suku so bele iha possibilidade atu trata kazu sira liuhosi medisaun ba kazu krime semi públiku sira hanesan ofensa ba simples, danu simples, amiasa no disputa simples sira seluk.

Iha enseramentu, xefe suku sira rekomenda atu JSMP bele halo tan planu ba treinamentu hanesan iha sira-nia suku, liu-liu ba hala'o fali iha aldeia seluk. Xefe suku sira mós husu ba nia membru sira atu bele hatutan tan informasaun sira ne'e ba membru comunidade seluk ne'ebé la partisipa iha formasaun ne'e.

Atividade ne'e realiza tanba hetan apoiu finanseiru hosi povu Australianu liuhosi AusAid.

Atu hetan informasaun kle'an favór kontaktu:

Luis de Oliveira Sampaio
Diretór Ezekutivu JSMP
Telefone: 3323883 | 77295795
Website: www.jsmp.tl